

## 2. 2. ՄԱՆԱՆԴՅԱՆԻ ՆՈՐԱՀԱՅՏ ՀՈԴՎԱԾԸ ԲՈՒԴԴԱՅԱԿԱՆՈՒԹՅԱՆ ՄԱՍԻՆ


Եղիշե Չարենցի անվան գրականության և արվեստի թանգարանում պահպանվող «Կովկասի Հայոց հրատարակչական ընկերության» ֆոնդում աշխատելիս մեր ուշադրությունը գրավեց մի ձեռագիր հոդված, որը կրում է «Բուրդայականության ազդեցությունը» խորագիրը: Ցուրաքանչյուր ոք, ով երբևիցե թերթել է խորհրդային ճշմարտության պատմաբան, ԽՍՀՄ ԳԱ ակադեմիկոս, Երևանի պետական համալսարանի ռեկտոր Հակոբ Համազասպի Մանանդյանի (1879—1952) ձեռագրերը, ապա առանց որևէ կասկածի կարող է հաստատել, որ բուրդայականությանը նվիրած սույն հոդվածը պատկանում է ճրագրչին: Նույն խնամքով, մարգարտաշար, գեղեցիկ ու հստակ ձեռագիրն է, ձեռագիր, որն անհնարին է շփոթել: Թերևս փոքր-ինչ վարանման տեղիք է տալիս հոդվածի հեղինակի ազգանունը՝ Հ. Մանանդյանց: Մեր կասկածները փարատելու համար դիմեցինք հայտնի ձեռագրագետ, պրոֆ. Պ. Հ. Հակոբյանին, որը ոչ միայն հաստատեց ձեռագիրը Հ. Հ. Մանանդյանին պատկանելու հանգամանքը, այլև հայտնեց, որ Ախալցխայում Մանանդյան ազգանվան ձևը հրնչել և օգտագործվել է նաև Մեներդյան ձևով, և որ Մանանդյանների ընտանիքը նախապես անվանվել է Մեներդյանց: Այս հանգամանքը որևէ կերպ փաստարկելու ակնկալությամբ ապացույցներ փնտրեցինք Հ. Մանանդյանի՝ Մատենադարանում գտնվող թղթոնի փաստաթղթերում: Երբ թվում էր, թե մեր փնտրումներն ավարտվելու են անարդյունք, ուշադրություն դարձրեցինք 1895 թ. Լայպցիգում կատարված մի լուսանկարի<sup>1</sup>: Սա խմբանկար է, ուր պատկերված են Գերմանիայում սովորող հայ ուսանողների ընկերակցության («Հայոց ճեմարանական ընկերություն») մի խումբ անդամներ: Կենտրոնում նստածը Եմայի համալսարանի փիլիսոփայության ֆակուլտետի 3-րդ կուրսի ուսանող, Լայպցիգի ու Սորբոնոյի համալսարանների արևելագիտական ու լեզվաբանական դասընթացների ունկնդիր Հակոբ Համազասպի Մանանդյանն է: Լուսանկարի վրա Հ. Մանանդյանը ճշել է թուրք նրանց ազգանունները, ովքեր պատկերված են խմբանկարում<sup>2</sup>: Իր ազգանունն այստեղ Հ. Մանանդյանը գրել է Մեներդյանց ձևով: Այլևս կասկած չի կարող, որ նորահայտ հոդվածի հեղինակ Հ. Մեներդյանը և հետագայի ճշմարտորդ Հ. Մանանդյանը նույն անձնավորությունն են: Այսպիսով պարզվեց Հ. Մանանդյանի կենսագրության մի կարևոր մանրամասն:

Ինքնին հասկանալի է, որ անցյալի մեր երախտավորների յուրաքանչյուր նորահայտ էջ, նամակ, հոդված առանձնակի հետաքրքրություն են ներկայացնում. դրանք ամբողջացնում են նրանց գիտական ժառանգությունը, ճշտում կենսագրության առանձին, չլուսարանված էջեր: Նշելի է, որ մենք համարյա ոչինչ չգիտենք նաև Մանանդյանի ուսանողական տարիների մասին: Նորահայտ հոդվածն այս տեսակետից շատ կարևոր է: Սրանից ինչ-որ չափով կարելի է պատկերացում կազմել ուսանող Մանանդյանի ուսումնառության, հետաքրքրությունների աշխարհայացքի, գիտելիքների բազմազանության մասին:

Հ. Մանանդյանի նորահայտ ձեռագիրը լավ է պահպանված: Հոդվածի գրության տարեթիվը ճշտվում է ձեռագրի առաջին էջի աջ անկյունի մակագրությամբ՝ «Ստացված է Ց ճոյեմբերի, 95 թ.»։ Դժբախտաբար հնարավոր չեղավ պարզել, թե ով է եղել հոդվածի հասցեատերը, և իձնու այն լույս չի տեսել:

<sup>1</sup> Տե՛ս Մ. Մաշտոցի անվան մատենադարանի արխիվային բաժին, ակադեմիկոս Հ. Հ. Մանանդյանի ֆոնդ, թ. 228, վ. 887:

<sup>2</sup> Առաջին շարքում նստած են ձախից աջ՝ Հախումյան, Արուստյան, Միհայրյան (հատակին), Մեներդյանց, Նալբանդյան, Խոջայան, երկրորդ շարքում կանգնած են ձախից աջ՝ Սեդրոյան (Ծանթ), Ծամտանճյան, Պողոսյան, Բունիաթյան, Ղուկասյան, Չարլքճյան (լուսանկարը տպագրվում է առաջին անգամ):



Հոդվածի բնագիրը պահվում է Ե. Չարենցի անվան գրականության և արվեստի թանգարանի Կովկասի Հայոց հրատարակչական ընկերության ֆոնդում (թածին I, № 25):

Պ. Լ. ՀՈՎՀԱՆՆԻՍՅԱՆ

### ԲՈՒԴԻԱՅԱԿԱՆՈՒԹՅԱՆ ԱԶԴԵՑՈՒԹՅՈՒՆԸ

(Բուդդան, բրանմանականություն և բուդդայականության բովանդակությունը և նրանց ազդեցությունը XIX դարի փիլիսոփայության վրա)

Նշանաբան՝

«Առողջ մտքի վրա հիմնված կրոնը պահանջում է, որ մարդիկ ճանաչեն բնության օրենքները և նրանց համեմատ կարգավորեն իրենց կյանքը,— դրա հակառակ եկեղեցական կրոնի մահամերձ սնտիապաշտությունը հրաժարվում է, որ մարդիկ թողնեն բնությունը, արհամարհեն նրա ճշմարտությունները և հրճագանդվեն իշխողասեր հոգևորականության օրենքներին»:

Haekel<sup>1</sup>

Հեկկել

Տասնևիններորդ դարը մեծ գյուտերի և արագընթաց առաջադիմության դար է: Մինչև տասնևյոթներորդ դարը մարդկության աշխարհայեցությունը շատ սահմանափակ էր: Բնությունն իր զանազան երևույթներով հազար ու մեկ

հանելուկ էր նրա համար: Յուրաքանչյուր անբացատրելի երևույթ հրաշք էր անվանվում և մի որևէ առասպելական ձևով բացատրվում:

Տասնևվեցերորդ դարից սկսած երևան են գալիս մի շարք գիտնականներ, որոնք բնության օրենքներին ծանոթանալու համար խորամուտ են լինում նրանց մեջ: Այդ գիտնականների աշխատանքները անօգուտ չեն անցնում: Յնծուծության աղաղակներով տարածվում է ի լուր աշխարհի, որ բնության մեջ կամայականության և անիշխանության փոխարեն հաստատ և անփոփոխելի օրենքներ են իշխում: Այդ ճշմարտության հետ միասին երևան է գալիս և աշխարհի զարգացման (Evolution) վարդապետությունը<sup>2</sup>: Հիշած երկու նոր գյուտերը գիտությունների և կյանքի յուրաքանչյուր անկյունում մի մեծ հեղափոխական շարժում են առաջ բերում: Հին կրոնական փիլիսոփայությունը, բոլոր գիտությունների հպարտ և շքնաղ մայրը, բնագիտական գիտությունների արհամարհված դուստրն է դառնում: Բայց երկար չէ տևում այդ դրությունը. արհամարհված դուստրը ուշադրությամբ լսում է իր ծնողների խրատները և խնամքով քավում իր հին մեղքերը: Նոր փիլիսոփայությունը, հաստատ մնալով իր ծնողների դաստիարակությանը, քար ու քանդ է անում հին առասպելական աշխարհայեցողությունը և նորերումս մի մեծ քար է ձգում դեպի հին աստվածների քարոզած բարոյականությունը: Փիլիսոփայության հեղաշրջման պատճառով սկսում են պատմական անցքերը նոր շափերով շափել: Հին հեթանոսական անվանված գաղափարները և վարդապետություններն արձագանք են գտնում նոր փիլիսոփայության մեջ: Հին վարդապետություններից բուդդայականությունը մանավանդ զրավում է գիտնականների ուշադրությունն ու հարգանքը:

Բուդդայի իսկական անունը Սիդդարթա է<sup>3</sup>: Նա ծնվել է Հարավային Հընդկաստանում<sup>4</sup> 560 թ. Քր. առաջ<sup>5</sup>: Նրա հայրն կոչվում էր Շուդդուրանա<sup>6</sup>, իսկ մայրը՝ Մայա<sup>7</sup>. առաջինը հարուստ և նշանավոր Շակիա տոհմից էր: 29 տարեկան հասակում Բուդդան թողնում է հայրական տունը և իրեն փիլիսոփայական ուսման է նվիրում, իսկ հետո ճգնավոր է դառնում և իր իսկական անունը Գաուտամա փոխում<sup>8</sup>: Շատերը նրան անվանում են Շակիամունի<sup>9</sup>, որը նշանակում է «Շակիա տան ճգնավոր»: Իր փրկության վարդապետությունը ստեղծելուց հետո նա իրեն անվանում է Բուդդա՝ «Լուսավորված»<sup>10</sup>, կամ Տաթագատա՝ «Կատարելագործված»: Մոտ 400 թ. Քր. առաջ Բուդդան իր ալևոր հասակում մեռնում է<sup>11</sup>, սիրելի աշակերտներով շրջապատված:

Natura non facit saltus, ne mens guidem (բնությունը թռիչքներ չի գործում, նույնպես և հոգեկան կյանքը), ասում է նոր փիլիսոփայությունը, զարհուրանք պատճառելով այն հետադեմներին, որոնք բնության և հոգեկան կյանքի յուրաքանչյուր անկյունում հրաշքներ են պտրում: Ինչպես բնության մեջ հազարավոր գոյորշիններ երկրից երկինք են բարձրանում, միասին ամպեր են կազմում և անձրև դառնալով՝ զովություն և կյանք մատակարարում բնությանը, նույնպես և մարդկության մեջ այս և այնտեղ ցրված գաղափարները միանում են մի որևէ անհատի մեջ, որը նպատակահարմար կերպով միացնում է այդ գաղափարները և դրանց օգնությամբ մի նոր միտք է արտադրում, որ ամառնային մեղմ քամու պես զովացնում է մարդկությունը: Բուդդայի վարդապետությունը երկնքից իջացած հանկարծակի մի հայտնություն չէ, այլ հընդկական ոգու արտահայտություններից մեկը:

Բուդդայի ծնվելուց առաջ, դեռ հնդկական անտառներում ցրված կային փոքրիկ տնակներ, որոնց ալեզարդ բնակիչները բնության և գոյության օ-

րենքներն էին հետազոտում: Սրանք քարոզում էին որ, ինչպես մարդիկ, այնպես և աստվածները, կենդանիները և բոլոր իրերը երևույթների շղթայի մասեր են: Յուրաքանչյուր եղելություն կատարվում է համաձայն տիեզերական օրենքների, որոնց ենթարկված են նույնպես և աստվածները: Յուրաքանչյուր պատճառ ունի իր հետևանքը և յուրաքանչյուր հետևանք իր պատճառը, ուստի հիմարություն կլինի հավիտենական վարձատրության գոյությունն ընդունել: Տիեզերքի մեջ գոյություն ունի մի ընդհանուր ոգի՝ âtman կամ brahmân: Մարդկության նպատակը պետք է լինի ոչնչանալ և միանալ Բրահմանի (Brahmân)-ի հետ:

Այդպիսի փիլիսոփայական վարդապետությունները վեդդայական բազմաստվածության փոխարեն ընդունում էին Բրահմանի գոյությունը և այդ պատճառով անվանվում էին բրահմանականություն<sup>12</sup>: Վերջինը անտարբեր էր դեպի Հնդկաստանում տիրող վեդդայական կրոնը և գործնական կերպով չէր պատերազմում հին աշխարհայեցողության դեմ: Սրա հակառակ՝ բուդդիզմը, որ բրահմանիզմի հետ շատ ընդհանուր կողմեր ունի, պատերազմական դիրք է բռնում դեպի վեդդայական կրոնը<sup>13</sup>: Բուդդայականությունը մերժում է Վեդդայի հեղինակությունը, աստվածների երկրպագությունը և ժողովուրդը դասակարգերի բաժանելը: Այդ ամենի փոխարեն Բուդդան քարոզում է վշտի և պատճառականության (kausalität) վարդապետությունը:

Միայն անմիտ թեթևամտությունը, — ասում է Բուդդան, — կարող է շնրկատել, որ կյանքը վշտով և թշվառություններով լի է: Կենաց վշտերի դեմ փրկության բանալին գտնելու համար Բուդդան թողնում է հայրական տունը, սիրելի ծնողներին և ինքն իր մեջ խորասուզված՝ օր և գիշեր աշխատում է, որ իր նպատակն իրագործի: Ծրկար տարիներ մտածելուց և աշխատելուց հետո, մի օր Բուդդան գալիս նստում է մի ծառի տակ<sup>14</sup> և իր մտքերի մեջ խորասուզվում: Հանկարծ՝ կարծես մի լույս է իջնում ուժաթափված փիլիսոփայի վրա և նա մտքի խորքում թափանցում և ըմբռնում է վշտի ծագումը: Բուդդայի այդ գյաւտը, որ անվանվում է բուդդայական շղթա, հետևյալն է՝

անգիտությունից ծագում է գոյությունը,  
գոյությունից—գիտակցությունը,  
գիտակցությունից—զգայարանքները,  
զգայարանքներից—նրանց շփումը արտաքին կյանքի հետ,  
այդ շփումից առաջանում է ցանկությունը,  
ցանկությունից—գոյության սերը,  
այդ սիրուց—լինելը,  
լինելուց—ծնունդը.  
վերջապես՝ ծննդից առաջանում են ծերությունը,  
մահ, ցավ և վիշտ:

Փրկությունը նրանում է կայանում, որ անգիտությունը փոխարինվի գիտությունով, որպեսզի անգիտության բոլոր հետևանքները ոչնչանան: Մարդկության գլխավոր նպատակը պիտի լինի ձգտել դեպի նիւրվանա<sup>15</sup>, որովհետև նիրվանան վշտերով լի գոյությունից ավելի լավ է: Որպեսզի մարդկությունը այդ նպատակին հասնի, նա պետք է սանձահարե իրա կրքերը, դիտե բնությունը արվեստական օրյեկտիվ (անշահակից) բարձրությունից: Մարդս սերտ կապված է պատճառականության օրենքների հետ, ուստի աստվածների մասին խորհելու փոխանակ, պետք է պատճառականության օրենքները, կամ բուդդայական շղթան ուսումնասիրության առարկա դարձնել:

Աստվածներ լսելով ընդհանրապես հասկանում են զանազան դարերում

զանազան ժողովուրդներից զանազան ձևով ընդունված մի տիեզերական ուժ, որը աշխարհիս և մարդուս դեկավարն է:

Մարդկության մի մասը աղոթքներով, զոհերով, իսկ ֆետիշապաշտները<sup>16</sup> մինչև անգամ ծեծով ուզում են աստվածներին հաճելի լինել, Աշխարհիս կրոնների մեջ բուդդիզմը միակն է, որ աստվածներ, զոհաբերություն և աղոթք մերժում է: Այդ ամենը նա փոխարինում է տիեզերական օրենքով, որ ոչ ականջ ունի մեր աղոթքները լսելու և ոչ ստամոքս՝ մեր զոհերը ճաշակելու համար<sup>17</sup>:

Բուդդայի շրջապատողներից շատ քչերը հասկացան նրա քարոզածը: Տասնևիններորդ դարին էր վիճակված գնահատել Արևելքի փիլիսոփայի գյուտը: Այդ գնահատողներից էին՝ Արթուր Շոպենհաուերը<sup>18</sup>, էդուարդ ֆոն Հարդմանը<sup>19</sup> և Լև Տոլստոյը<sup>20</sup>:

Ա. Շոպենհաուերը Բուդդայի ամենաեռանդուն հետևողներից մեկն է: Նրա բուդդիզմի մեջ մտցրած փոփոխությունները անչափ [կարևոր] են, որ մենք նրան տասնևիններորդ դարի Բուդդա ենք անվանում: «Մարդուս մեջ ամենից էական հատկություններն են,— ասում է Շոպենհաուեր,— ցանկալը և ձգտելը, որոնք անշեջ ծարավի են նման: Յուրաքանչյուր ցանկության շարժառիթն է կարոտությունը: Երբ մարդու ցանկացածը հեշտ կերպով իրականանում է, այն ժամանակ նա զգում է ձանձրույթ և դատարկություն»: Ա. Շոպենհաուերի կարծիքով, կյանքը թշվառությունների գործվածք է, հետևաբար մարդկության նպատակը պետք է լինի ձգտել դեպի բուդդայական Նիրվանա: Շոպենհաուերի հոռետես աշխարհայեցողությունը բազմաթիվ հետևողներ ունի:

Մեր կարծիքով, այդ բոլոր ապրելուց հոգնած անձնավորությունների սխալը կայանում է նրանց միակողմանիության մեջ: Պեսիմիստները<sup>21</sup> մոռանում են, որ կյանքը՝ ոչ թե միայն վշտերի գործվածք է, այլ վշտերի և հաճույքների: Ա. Շոպենհաուերի արժեքը նրանում ենք տեսնում, որ նա ենթադրությունների վրա հիմնած կրոնի փոխարեն իրա փիլիսոփայական սիստեմի մեջ ընդունեց բուդդայական գիտնական կրոնը, որը համառ կերպով քարոզում է, որ բնության բանալին, առասպելական անբնական հայտնությունների մեջ որոնելու փոխանակ, հենց իրեն բնության մեջ պետք է պտրել: Այս նոր ճշմարտությունով լուծվում է կրոնական խնդրի մի կողմը, որով հայտնությունների կրոնները բնության հետազոտությունով են փոխարինվում, իսկ բազմազգեստ աստվածները՝ անվերջ տիեզերքով:

Կրոնական պրոբլեմի մյուս մասը կրոնական բարոյագիտությանն է վերաբերվում: Այդ մասին մի ուրիշ անգամ:

## Լ. ՄԵՆԵՆԴԵԱՆՑ

### ՄԱՆՈՒԱԳՐՈՒԹՅՈՒՆՆԵՐ

<sup>1</sup> Հեկկել (Haeckel) Էռնստ (1834—1919)— գերմանացի դարվիճիստ կենսաբան, Իենայի Քսենալսարանի Քսենալստական անատոմիայի և կենդանաբանության ամբիոնի պրոֆեսոր: Բնապատմական մատերիալիզմի և 2. Դարվիճի էվոլյուցիոն ուսմունքի տարածող, պաշտպանել է բնության ցկատմամբ մատերիալիստական հայացքներ, խզել է կապերը եկեղեցու և կրոնի հետ: Առաջարկել է պաշտոնական կրոնը փոխարինել բնության աստծու հավատով:

<sup>2</sup> Էվոլյուցիոն տեսությունը (կենդանի բնության զարգացման ուսմունքը) գլխավորապես մշակել է 2. Դարվիճը և դարձել դիալեկտիկական-մատերիալիստական աշխարհայացքի բնագիտական հիմքը: Էվոլյուցիոն տեսության զարգացնողներն են Թոմաս Հեքսլին (1825—1891), Էռնստ Հեկկելը, Կ. Ա. Տիմիրյազևը (1848—1920) և ուրիշներ:

<sup>3</sup> Սիդդարթա—արտասանության ճիշտ ձևն է Սիդդհարթթա, որը քառացիորեն նշանակում է «իր կոչումն իրագործած»:

<sup>4</sup> Այստեղ թյուրիմացություն է պետք է լինի Հյուսիսային Հնդկստան: Ավանդության

համաձայն Բուդդան ծնվել է Կապիլավաստու մայրաքաղաքին մերձ Լուսինի վայրում՝ Նեպալից ոչ հեռու (տե՛ս Գ. Մ. Бонгард—Левиян, А. В. Гераскмов, Мудрецы и философы древней Индия, М., 1975, էջ 83):

<sup>5</sup> Մեկ այլ, առավել ընդունված տեսակետի համաձայն Բուդդան ծնվել է մ. թ. ա. 628 թվականին:

<sup>6</sup> Ծուդդորանա—արտասանության ճիշտ ձևն է Ծուդդհոդանա:

<sup>7</sup> Մայա, ավելի ճիշտ է Մահամայա, որը նշանակում է «Մեծ Մայա»: Մահամայան մի անգամ երագում տեսնում է, թե ինչպես ապիտակ փիղը մտնում է իր կողը: Սրանից հետո Մահամայան հիիանում է և որոշ ժամանակ անց ծնում տղա երեխա՝ Բուդդային:

<sup>8</sup> Իրականում Բուդդայի իսկական անունը Սիդդհարթհա Գաուտամա է, «Բուդդա» անվանումը նրան տրված էպիտետ է, որն առաջացել է ավելի ուշ:

<sup>9</sup> Գրության ճիշտ ձևն է Ծակեյ-Մունի:

<sup>10</sup> Երբեմն թարգմանվում է «պայծառամիտ», «պայծառության հասած»:

<sup>11</sup> Ավանդության համաձայն Բուդդան մահացել է Կուշինաբարում, մոտավորապես մ. թ. ա. 488 կամ 486 թվականի մայիսին, շուրջ 80 տարեկան հասակում:

<sup>12</sup> Բրահմանականություն—հին հնդկական կրոն: Ծագել է մ. թ. ա. I հազարամյակում, սրբագործել է հասարակության կաստայական կառուցվածքը: Բրահմանականությունը կազմվել է աստվածային երրորդությունից (Բրահման, Ծիվա, Վիշնու):

<sup>13</sup> Նախնադարյան համայնական կարգերի քայքայման ու դասակարգային հասարակության ձևավորման ժամանակըջանի հին հնդկական կրոնափիլիսոփայական ուսմունք: Վեդայականության կրոնական պատկերացումներն ամփոփված են չորս գլխավոր սուրբ գրքերում՝ Ռիգվեդա, Աթհարվավեդա, Սամավեդա և Յուջուրվեդա (մ. թ. ա. 12—7-րդ դարեր):

<sup>14</sup> Լեգենդի համաձայն, Բուդդան իր ուսմունքը հայտնագործել է Նաիրանջան գետի ափին՝ Ուրուվիլվայում, ներկայիս Բիհար նահանգի Բոդի-Գայ վայրում (տե՛ս А. Н. Кочетов, Буддизм, М., 1983, էջ 11):

<sup>15</sup> Նիրվանա (քառացորեն թարգմանվում է անընչություն) — բուդդայականության հիմնական հասկացությունն է: Նշանակում է մարդու հոգևոր զարգացման վերջնական նպատակը, որը հասանելի է միայն ընտրյալներին, նրանց, ովքեր կարողանում են հաղթահարել ամեն մի ցանկություն և փափագ: Նիրվանայի կարելի է հասնել հինգ առաքինությունների (հավատ, արիություն, ուշադրություն, կենտրոնացում, իմաստություն) հետևողական զարգացմամբ (տե՛ս С. Радхакришнан, Индийская философия, т. I, М., 1956):

<sup>16</sup> Ֆետիշիզմ (թարգմանվում է որպես հմայի, թախման) լայնորեն տարածված է բոլոր կրոններում, այդ թվում նաև բուդդայականության մեջ:

<sup>17</sup> Հեղինակը նկատի ունի այն հանգամանքը, որ բուդդիզմը մարդկության փրկությունը որոնում էր ոչ թե սոցիալական վերափոխումների ու բնության ուժերի դեմ պայքարի, այլ բարոյական կատարելագործման մեջ: Իսկ սա կարելի էր ձեռք բերել միայն կյանքից հեռանալու, Նիրվանայի մեջ խորասուզվելու միջոցով:

<sup>18</sup> Ա. Ծոպենհաուեր (1788—1860)—գերմանացի իդեալիստ փիլիսոփա, Բեռլինի համալսարանի պրոֆեսոր (1820—1832): Ա. Ծոպենհաուերն իր հիմնական «Աշխարհը որպես կամք և պատկերացում» աշխատությունում (հատ. 1—2, 1819—1844) զարգացրել է մետաֆիզիկական իդեալիզմը, ժխտել պատմական առաջադիմությունը, քացառել բնության և հասարակության գիտական ճանաչողության հնարավորությունը:

<sup>19</sup> Է. Ֆոն Հարթման (1842—1908)—գերմանացի իդեալիստ փիլիսոփա: Նրա «Անգիտակցական փիլիսոփայությունը» (1869) աշխատությունը մեծ ազդեցություն է ունեցել իդեալիզմի վուլունտարիզմի ժամանակակից դպրոցների վրա:

<sup>20</sup> Ռուս նշանավոր գրող Լ. Ն. Տոլստոյի (1828—1910) կրոնափիլիսոփայական հայացքների վրա որոշակի ազդեցություն են գործել նաև կոնֆուցիականության և բուդդայականության գաղափարները: Հայտնի է, որ Լ. Տոլստոյը հատուկ վերաբերմունք ու ակնածանք ուներ բուդդիզմի նկատմամբ: Նա պարբերաբար ուսումնասիրել է այն, և համարվում էր այդ կրոնի լավագույն գիտակներից մեկը Ռուսաստանում: Զգալի է բուդդիզմի դերն ու նշանակությունը Տոլստոյի ստեղծագործություններում: «Չարին չհակադրվելու», «չարին բռնությամբ չիմամդրելու» ոռու գրողի տեսությունը, անշուշտ, մեծ չափերով փոխառնված է բուդդիզմից (մանրամասն տե՛ս А. И. Шляфма, Лев Толстой и Восток, М., 1971, էջ 118—125):

<sup>21</sup> Պեսիմիզմ (հոռետեսություն)—փիլիսոփայական աշխարհայացք, ըստ որի իրադարձություններն ընթանում են դեպի վատը: Սա արտահայտվում է հատկապես անկումային տրամադրությունների, թարոյ ու արդարության հաղթանակի նկատմամբ հավատի քացակայության մեջ: